

KËSHILLI I MINISTRAVE

PROJEKTIVENDIM

Nr. \_\_\_\_\_, datë \_\_\_\_\_ 2023

**“PËR  
PËRCAKTIMIN E PROCEDURËS DHE MËNYRËS SË KOMPENSIMIT TË DREJTË  
PËR PËRDORIMIN E VEPRAVE PA AUTOR”**

Në mbështetje të nenit 100 të Kushtetutës, të pikës 4 të nenit 75/2, të ligjit nr. 35/2016 datë 31.03.2016 “Për të drejtat e autorit dhe të drejtat e tjera të lidhura me to”, i ndryshuar, me propozimin e ministrit të Kulturës, Këshilli i Ministrave,

**VENDOSI:**

1. Ky projektvendim ka për objekt përcaktimin e rregullave dhe procedurës së kompensimit të drejtë për autorin ose bashkautorin pasi është dhënë fund statusit si vepër pa autor.
2. Për qëllim të këtij projektvendimi termat “vepër pa autor” dhe “kompensim i drejtë” kanë të njëjtin kuptim si në ligjin nr. 35/2016 “Për të drejtat e autorit dhe të drejtat e tjera të lidhura me to”, i ndryshuar.
3. Autori, bashkautori, ose agjencia e administrimit kolektiv, e autorizuar prej tij, i paraqet institucioneve të parashikuara në pikën 1, të nenit 16/2, të ligjit për të drejtën e autorit, një kërkesë me shkrim për t’i dhënë fund statusit si vepër pa autor.
4. Kërkesa për t’i dhënë fund statusit si vepër pa autor shoqërohet me dokumentacionin si më poshtë:
  - a) Dokumenti i identifikimit të autorit ose bashkautorit.
  - b) Dokument që vërteton se kërkuesi është titullar i të drejtave për veprën pa autor;
  - c) Kërkesë për kompensim të drejtë ose një deklaratë se një kompensim i tillë nuk është i nevojshëm;
  - ç) Të dhëna mbi vendndodhjen e autorit ose bashkautorit;
  - d) Aktin noterial të përfaqësimit në rast se kërkesa kryhet nga një përfaqësues ligjor.
5. Mungesa e njërit prej dokumenteve sipas pikës 4 të këtij vendimi sjell refuzimin e kërkesës.
6. Institucionet sipas pikës 3 të këtij vendimi shqyrtojnë kërkesën për përfundimin e statusit vepër pa autor brenda 30 ditëve kalendarike nga marrja e saj.

7. Institucioni njofton menjëherë ministrinë përgjegjëse për të drejtën e autorit për përfundimin e statusit vepër pa autor dhe fillimin ose jo të procedurave për kompensimin e drejtë.
8. Ministria përgjegjëse për të drejtën e autorit përditëson bazën e të dhënave për veprat pa autor.
9. Pas përfundimit të statusit vepër pa autor, institucioni përdor veprën vetëm me autorizim/kontratë me shkrim të autorit, bashkautorit apo titullarit të të drejtave të veprës origjinale.
10. Procedura për kompensimin e drejtë për përdorime të veprave pa autor nis me kërkesë me shkrim të autorit, bashkautorit ose agjencisë së administrimit kolektiv, të autorizuar prej tij.
11. Institucionet sipas pikës 3 të këtij vendimi përcaktojnë shumën e kompensimit të drejtë dhe mënyrën e shpërblimit sipas konsultimit me autorin ose bashkautorin.
12. Shuma e kompensimit të drejtë do të përcaktohet duke marrë parasysh:
  - a) Qëllimin e përdorimit të veprës sipas përcaktimit të nenit 75/2 të ligjit nr. 35/2016 “Për të drejtat e autorit dhe të drejtat e tjera të lidhura me to”, i ndryshuar.
  - b) Dëmin e shkaktuar autorit ose bashkautorit gjatë përdorimit të veprave pa autor në lidhje me të drejtat personale pasurore dhe jopasurore të tyre.
  - c) Shpenzimet e institucionit për të kryer kërkimet shteruese për përcaktimin e statusit “vepër pa autor”, digjitalizimin, indeksimin, katalogimin, ruajtjen apo edhe vënien në dispozicion të publikut të veprës pa autor.
13. Institucionet sipas pikës 3 të këtij vendimi, pas konsultimit me autorin apo bashkautorin përcaktojnë kompesimin e drejtë, bazuar në metodologjinë dhe masat e tarifave të shpërblimit të veprave të mbrojtura nga e drejta e autorit në sistemin e administrimit kolektiv, duke ju referuar të njëjtës kategori veprash, brenda 30 ditëve kalendarike nga marrja e kërkesës”.
14. Kompensimi paguhet nga institucioni që ka përdorur veprën.
15. Nëse vepra është në bashkautorësi kompensimi i paguhet titullarëve të të drejtave bashkërisht. Në rast të mungesës së informacionit për pjesën takuese të secilit bashkautor, kompensimi do të paguhet në masa të barabarta.
16. Në rast se autori ose bashkautori nuk është dakort me shumën e kompensimit, kanë të drejtë t'i drejtohen gjykatës.
17. Ngarkohen Ministria e Kulturës, bibliotekat publike, institucionet arsimore, muzetë, personat e tjerë juridikë që kryejnë veprimtari muzeore, arkivat, institucionet arkivore filmike ose audiovizuale dhe transmetuesit publikë që janë krijuar në Republikën e Shqipërisë për zbatimin e këtij vendimi.
18. Ky vendim hyn në fuqi pas botimit në Fletoren Zyrtare.

**K R Y E M I N I S T R I**  
**E D I R A M A**